



Vrijednost tevhida (Meka)

Hatib: dr. Abdurrahman ibn Abdulaziz es-Sudejs

17. rebiul-evvel 1446. po Hidžri / 20. septembar 2024.

Hvala Allahu, Njega hvalimo, od Njega pomoć i oprost tražimo, i Njemu se kajemo. Sva hvala pripada Njemu.

Svjedočim da nema boga osim Allaha, Jedinog, Koji nema sudruga, priznajući Njegov rububijet – da je On jedini Apsolutni Gospodar, uluhijet – da je On jedini dostojan obožavanja i Njegovu uzvišenost i jednoću, i svjedočim da je naš poslanik Muhammed, Allahov rob i Njegov poslanik, najbolji čovjek koji je pozivao u tevhid, vjerovanjem i djelom, neka su Allahovi blagoslovi na njega, na njegovu čistu porodicu, koja je stub istine i časti, i njegove ashabe koji su se trudili za riječ istine, i na tabiine i one koji ih slijede u dobročinstvu, koji se nadaju obećanju i boje se prijetnje, neka je mnogo Allahovih blagoslova na sve njih do Sudnjeg dana.

O ljudi, bojte se Allaha, vašeg Gospodara, i obožavajte Ga, i pokoravajte Mu se, i vjerujte u Njega, vi nemate drugog boga osim Njega, niti drugog gospodara osim Njega, niti drugog boga koji je dostojan istinskog obožavanja osim Njega.

O vjernici, nakon što je, na neko vrijeme, prekinuto slanje poslanika, došao je blagi povjetarac islamske poruke, sa svojim uzvišenim božanskim zakonima, koje su prihvatile čiste duše, bez odbijanja ili prikrivanja. Islam je došao sa čistim vjerovanjem, koje se smjestilo u dubinama srca, i duša se uzdigla s njim do vrhova uzvišenosti; to je vjerovanje tevhida – obožavanja jednog Boga, Allaha, Uzvišenog. Allah je stvorio Svoje robove u čistoj vjeri, ali su ih šejtani odveli od njihove vjere, i uljepšali im puteve zablude i stranputice. U vjerodostojnom hadisi-kudsiju, Uzvišeni Allah kaže: "Stvorio sam Svoje robove u čistoj vjeri (hunefā), ali su im šejtani došli i odveli ih od njihove vjere, i zabranili im ono što sam im dozvolio, i naredili im da Mi pripisuju kao sudruga ono za što nisam objavio dokaz." (Muslim) Uzvišeni Allah





kaže: "A naređeno im je da samo Allaha obožavaju, iskreno Mu ispovijedajući vjeru, kao pravi vjernici." (El-Bejjina, 5)

Ummete imana, tevhid – vjerovanje u jednog Boga, Allaha, Uzvišenog, uključuje vjerovanje u Njegov rububijet – apsolutnu vlast, posjedovanje i upravljanje, uluhijet – dostojnost obožavanja i Njegova imena i svojstva: "Allah ima najljepša imena i vi Ga zovite njima, a klonite se onih koji iskreću Njegova imena – kako budu radili, onako će biti kažnjeni!" (El-A'raf, 180). Iako tevhid ima uzvišeno mjesto, njegovo očuvanje i ispunjavanje njegovih uvjeta i zahtjeva, posebno u primjeni, na praktičnom polju i u konkretnim životnim situacijama, predstavlja najveći cilj u cijelom životu; jer je najveći cilj šerijata očuvanje vjere, i zaštita vjerovanja od svih vrsta prekršaja, širka – idolatrije, novotarija i izmišljotina. To se ostvarilo kroz uputu Poslanika, sallallahu alejhi ve sellem, riječima i djelima; njegov život bio je živa slika pokornosti, poniznosti, potrebe za Allahom i oslanjanja na Njega, Jedinog.

O muslimani, islam svoje sljedbenike odgaja u okrilju principa tevhida, jednoboštva, ispravnog vjerovanja, snažnog uvjerenja, oslanjanja samo na Allaha, slijeđenja sunneta i pridržavanja puta prvih generacija muslimana, a udaljio ih je od iluzija, sumnji i maštarija koje zbunjuju njihove umove, truju njihove misli i čine da stvari vide drugačijima nego što one jesu. Zabranio je sve što narušava taj princip, poput traženja posredovanja od mrtvih, evlija, i potiranje njihovih grobova, mauzoleja i turbeta radi postizanja blagoslova. Mnogi ih hodočaste, tražeći od njih, mimo Allaha, podizanje deredža, otklanjanje nevolja, ispunjenje potreba i liječenje bolesnih, i tvrde da ih oni vode do najuzvišenijih ciljeva, najviših stepeni, ispunjavaju im potrebe, daruju im talente i sigurnost od opasnosti, kao da je Uzvišeni Allah zatvorio Svoja vrata pred potrebama Svojih stvorenja. Uzvišen je Allah i visoko iznad onoga što govore i rade.

Ummete islama, najveća zapovijed je tevhid – obožavanje Allaha Uzvišenog, a najveća zabrana je širk – pripisivanje sudruga Allahu Uzvišenom.





Uzvišeni Allah kaže: "Mi smo svakom narodu poslanika poslali: "Allahu se klanjajte, a kumira se klonite!" (En-Nahl, 36); "Ne stavljaš uz Allaha nekog drugog boga – da ne bi osudu zaslužio i bez podrške ostao!" (El-Isra, 22).

U vjerodostojnom hadisu, Poslanik, sallallahu alejhi ve sellem, upitan je: "Koji je grijeh najveći?", pa je rekao: "Da Allahu pripišeš druga, a On te stvorio." (Muttefekun alejhi)

Širk podrazumijeva da se neki vid ibadeta usmjeri nekom drugom mimo Allaha, poput kurbana, zavjeta, dove, traženja pomoći, oslanjanja, straha, nade i slično.

Uzvišeni Allah kaže: "Samo se Njemu možete moliti! A oni kojima se pored Njega mole – neće im se odazvati, kao što ni voda neće stići u usta onome koji prema njoj samo dlanove svoje pruži; molitva nevjernika je stvar izgubljena." (Er-Ra'd, 14)

"A oni kojima se, pored Njega, klanjate ne posjeduju ništa." (Fatir, 13)

"Allah neće oprostiti da Mu se neko drugi smatra ravnim, a oprostit će manje grijehe od toga kome On hoće." (En-Nisa, 48)

"O sinko moj, ne smatraj druge Allahu ravnim, mnogoboštvo je, zaista, velika nepravda." (Lukman, 13)

O muslimani, i pored teške situacije u kojoj se nalazi naš ummet, u mnogim dijelovima gdje su se proširile novotarije i izmišljotine, koje sramote vjernike i zaslužuju da za njih prolijemo suzu tuge, nema izlaza za zajednicu, osim da se vrati svojim izvorima ponosa i sjaja, svojoj časti i blistavosti, i slijedi put prvih generacija ove zajednice, ashaba i tabiina, neka je Allah zadovoljan svima njima. U dva Sahiha bilježi se od Abdullaha ibn Mesuda, radijallahu anhu, da je Poslanik, sallallahu alejhi ve sellem, rekao: "Najbolje generacije su moja generacija, zatim oni koji dolaze poslije njih, zatim oni koji dolaze poslije njih." Abdullah ibn Mesud, radijallahu anhu, rekao je: "Ko želi da slijedi, neka slijedi one koji su umrli, jer živi nisu sigurni od iskušenja." To su ashabi Muhammeda, sallallahu alejhi ve sellem, najiskrenijih srca, najtemeljitijeg znanja i najjednostavnije prakse u ovome ummetu.





Vođa pravovjernih, Omer ibn Abdulaziz, Allah mu se smilovao, rekao je: "Allahov Poslanik, sallallahu alejhi ve sellem, i vladari poslije njega uspostavili su sunnete, čije pridržavanje vodi ka slijedenju Allahove Knjige i upotpunjenju pokornosti Allahu. Niko od stvorenja nema pravo da ih mijenja ili zamjenjuje, niti da razmatra nešto što im je suprotno. Ko se njima rukovodi, on je upućen, ko traži pomoć kroz njih, on je pomognut, a ko ih napusti i slijedi drugi put mimo puta vjernika, Allah će ga prepustiti onome što je izabrao i uvesti ga u Džehennem, a loše je to prebivalište."

Također, poštivanjem svih ashaba i majki vjernika, neka je Allah zadovoljan svima njima i neka ih nagradi, zajedništvom i vođstvom, slušanjem i pokoravanjem vladarima u dobru, ostvaruje se ispravno vjerovanje i distancira se od zabudjelih puteva i frakcionaštva.

O sljedbenici tevhida i ispravnog vjerovanja, učite svoju djecu čistom tevidu i odgajajte ih na putu ispravnih prethodnika, neka je Allah zadovoljan njima, i zaštitite ih od stranih zabudjelih ideja i neutemeljenih vjerovanja. Neka im pripadnost ispravnoj akidi bude izvor ponosa i časti.

O kako je ummetu potrebno da se vrati u okrilje svjetla dviju objava, ujedinjenih oko Kur'ana i sunneta i pridržavanja puta prvih generacija, kako bi postigao dobro na ovom i onom svijetu. Molimo Allaha da nas poživi u tevidu i ispravnom vjerovanju, i da nas usmrti na pravom i jasnom putu. On je plemenit i darežljiv. Utječem se Allahu od prokletog šejtana: "I doista, ovo je Pravi put moj, pa se njega držite i druge puteve ne slijedite, pa da vas odvoje od puta Njegova; eto, to vam On naređuje, da biste se grijeha klonili." (El-En'am, 153)

Molim Allaha da podari blagoslov i meni i vama u dvjema objavama, i da podari da se okoristimo uputom predvodnika ljudi i džina. Rekoh ovo, i tražim oprost od Allaha, Velikog i Uzvišenog, za sebe i vas, i za sve muslimane i muslimanke, od svih grijeha i pogrešaka, a tražite i vi oprost od Njega i pokajte Mu se, zaista moj Gospodar mnogo prašta i milostiv je.





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJE
KOJU TOKOM HUTBE ELABORIRA." (PREPOROD)

HUTBE 

O vjernici, bojte se Allaha Uzvišenog i znajte da je najbolji govor Allahova Knjiga, a najbolja uputa je uputa Muhammeda, sallallahu alejhi ve sellem. Najgore stvari su novotarije, a svaka novotarija je zabluda.

O vjernici, potreba za zaštitom čistog tevhida i zatvaranjem puteva širka posebno se povećala u današnjem vremenu, vremenu medijskog otvaranja i društvenih mreža, koje mogu sadržavati neetički sadržaj koji narušava ispravnu islamsku vjeru.

Donosite salavate i selame na Mustafu, odabranog i pouzdanog predvodnika, uzora vjernika, poslanog s jasnim šerijatom, kao što vam je to naredio vaš Gospodar, Gospodar svjetova, rekavši u jasnoj Knjizi: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56)

